

Vör en paar Daag is Leevke na d' School komen. Man daar harr se neet mit reket: Jelto un Thade weren mit hör in een Klass komen. De nervig Twennels*, de al mit hör in d' Kinnergaarn west weren. Se hungun alltied* an dat Been van hör Moder, wenn se ankwemen un brullden*, wenn se in d' Kinnergaarn blieven sullen. Man wenn se eerst maal binnen weren un hör Moder weg weer, denn weren se blot an 't Argern, weren alltied luud un maakden alls kött. Se harren blot een Fründ, Tammo. Man de weer in en anner Grundschool komen.

Thade harr maal mit en Scheer in en Bild van Leevke sneden un an hör seggt, dat he hör hauen würr, wenn se dat een van de Erzieherskes vertellen dee. Hör Moder harr denn an de anner Dag en Gespreck mit en Erzieherin. Mit sien Bröör tosamen harr he bi en anner Gelegenheit an hör seggt, dat se neet mit na dat Kinnerturnen dürs. Leevke harr dat gaar neet recht verstahn, wat dat sull, un gung trotzdeem mit, ohn in d' Kinnergaarn wat daarvan to seggen. Man hör Moder verklaarde hör denn, dat neet de beid Jungs dat to bestimmen harren, well mitgahn dürs un well neet, blot de Erzieherskes. Un dat schreev Leevke sük denn ok achter hör Ohren.

In d' School hett Leevke sük tegen Amke sett. De beid sünd al in d' Kinnergaarn de beste Fründinnen west un sünd blied, dat se nu tosamen in een Klass komen sünd. De eerste Dagen hollen sük Jelto un Thade noch torügg. Se mutten sük seker ok eerst an d' School wennen*. Brullen doon se tominnst neet mehr, wenn hör Moder weggeiht, daar sünd se nu ok to old för. Man denn fangen se an, van Dag to Dag alltied en bietje mehr dumm Tügg to maken. Se nehmen anner Kinner bi 't Tafeltennis de Ball weg un willen weer anner Kinner seggen, wat se doon mutten un wat se neet doon düren, so dat ok hier nüms mehr wat mit hör to doon hebben will.

Eens Dags fallt Leevke denn up, dat besünners Thade in d' Unnericht so still is. Un bi Jelto kann se in d' Sportunnerricht blau Flecken an d' Arm sehn. He versöcht de to verstoppen*, as he sücht, dat Leevke daarhen kickt. To Huus vertellt Leevke hör Ollen daarvan. „Neet all Kinner hebben dat to Huus so good“, seggt hör Vater. „Wenn du daar nix tegen hest“, seggt hör Moder, „proot ik daar mörgen even mit dien Mesterske över, denn kann de wat unnernehmen. Villicht können Amke un du maal wat mit de beid Jungs tosamen maken? Wat meenst du?“ Daarvan is Leevke neet begeistert, ok Amke will dat neet.

In de token Sportstünn loost de Mester ut, mit well en Upgaav tosamen maakt worden sall. Leevke un Thade sallen de tosamen maken.

„Oh nee“, denkt Leevke, „alls, blot dat neet.“ Amke is mit en anner Wicht tosamenkomen. Man Leevke troot sük neet, wat to seggen. De Kinner sallen hör Foten annanner binnen un so flink as se können van dat een Enn van de Turnhall an de anner rennen. Normalerwies is Leevke leep flink, man Thade? Se stellen sük in een Rieg mit de anner Kinner up. „Dat schaffen wi“, flüstert Leevke hum to. „Dat denk ik ok“, antwoordt Thade, „wi beid winnen.“ Leevke is överrascht, Thade hett noch nooit mit hör proot. As de Mester fleit*, rennen de beid los, so flink as se können. Se hebben tosamen en good Rhythmus un komen as eerst an de anner Sied an. Se laten sük fallen, laggen un geven sük en „high five“. In de Moment hett Leevke all dat blöd Verhollen vergeten un fraagt bi 't Laggen: „Sallen wi in d' Paus tosamen Verstoppen spölen?“ „Heel* geern“, antwoordt Thade, un geiht na sien Bröör hen. „Büst du mall* in dien Kopp?“, fraagt Amke, as Leevke hör daarvan vertellt. „Dat weer vörhin bi d' Sport würkelk nett mit Thade. Laat uns dat doch tominnst een Maal versöken“, biddt Leevke. Se sücht daarbi weer de blau Flecken un hett Mitgefühl. „Wenn uns dat neet gefällt of de beid blot an 't Argern sünd, denn weer dat ok dat leste Maal. Dat segg ik di fast to.“ Amke traut hör Fründin un spöölt mit Leevke, Jelto un Thade in de groot Paus Verstoppen. Ok anner Kinner maken mit. As se keen Lüst mehr hebben, eten se tosamen hör Frohstück. Leevke un

Thade tuusken Appel tegen Wiendruven. De beid Twennels sünd frünnelk un hebben en Bült* gode Ideen, wat man spölen kann. In de tweed groot Paus sünd en paar Kinner up dat Klautergerüst. Nüms dürt up de Grund komen, denn daar is alls full van Lava, de in all Klören tinkelt.

Intüsken verstahn Leevke un Amke sük good mit Thade un Jelto. De beid Jungs hebben ok noch anner Frünnen funnen. Leevke is ok upfallen, dat de beid keen blau Flecken mehr hebben. Villicht kunn de Mesterske wat utrichten. Of un an stöört wall noch en Kind in de Klass, man dat is ja ok normaal, finnt se. Se hett de Twennels nu tominnst hör Frünnenbook geven, waar all Kinner ut hör Klass rinschrieven sallen. As Erinnerung an en mooi* Tied in de Grundschool. Un wenn dat alls so good blifft, nöögt* se de beid Jungs villicht ok to hör groot Sömmerparty, van de se al lang dröömt.

Vokabels:

Versöök = Versuch

de Twennels = die Zwillinge

alltied = immer

brullden v. brullen = weinen

sük wennen = sich gewöhnen

verstoppen = verstecken

fleit v. fleiten = pfeifen

heel = sehr

mall = verrückt

en Bült = eine Menge

mooi = schön

nöögt v. nögen = einladen